



Kalaallit Nunaata Savalimmiullu Naalagaaffiit Peqatigiit Nunarsuaq Tamakkerlugu Peqqissuunissamut Suleqatigiiffianut WHO-mut ilaasortanngorlutik ilanngutsinneqarnissaannik suliniuteqaqqullugit Savalimmiuni, Kalaallit Nunaanni aamma Islandimi Naalakkersuisut Nunat Avannarliit Killiit Siunnersuisoqatigiiffiata kaammattorpai.

(Aallartitat Siulittaasuat Pipaluk Lyng-Rasmussen)
(Siullermeerneqarnera)

Demokraatit isummerfigisassatut siunnersuummut saqqummiunneqartumut qujapput.

Qularutissaanngilaq, tamatta peqqissutsimut ilisimasanut nutaanerpaanut atorluanaanissatsinnik kissaateqartugut inuillu pisinnaatitaaffiinnut tunngasunut malinninnissamut.

Siusinnerusukkut Namminersorlutik Oqartussanit nalunaarutigineqarpoq, Kalaallit Nunaat suli pilersaaruteqaangitsoq Naalagaaffiit Peqatigiit Nunarsuaq Tamakkerlugu Peqqissuunissamut Suleqatigiiffianut WHO-mut¹ ilaasortanngorlutik ilanngutsinneqarnissamik pilersaaruteqaangitsoq. Tassunga politikkikkut suli isummertoqarsimanngilaq. Siusinnerusukkut tamanna pissuteqarpoq, pingaartumik sulisussaqaarniarnikkut piginnaanilinnillu pissarsiniarnermut unammilligassat. Taamaattumik paaserusunnarpoq, tamanna sukkut allanngorsimanersoq aammalu qulaajarneqaarsimanersoq, Kalaallit Nunaat sumut pituttussanersoq ilaasortanngorlutik ilanngutsinneqarnerminni sulisunut tunngatillugu. Kalaallit Nunaata WHO iluaqutigereepaa Danmarkip ilaasortaaneratigut tuberkuluusimullu akiuiniarnermut WHO toqqaannartumik suleqatigineqareerpoq.

COVID19-imut tunngatillugu Kalaallit Nunaata aamma nunat tamalaat suliniarnerat iluaqutigisimavaa nappaatinut tuniluuttunut pinaveersaartitsinermini, suliniaqatigiiffillu ilisarisanearluarpoq sulisunik ilinniarsimasunik ulluinnarni atuinermigut. Peqqinnissaqarfimmi kinaluunniit ilinniarsimasoq akuersissummik peqartoq pissaavaoq suliamini paasisat nutaat paasiniassallugit. Allatut oqaatigalugu pissaaffioreerpoq, assersuutigalugu Peqqissutsimut pisortaqarfiup Peqqinnissaqarfiullu ilisimasanik nutaanerpaanik pissarsiornissaa, innuttaasunik sullissinermi sulisunit aaneqarsinnaallutillu atorneqarsinnaasut.

Taamaattumik tunngavilersuutinik allanik amerlanernillu amigaateqarpunga, sukkut Kalaallit Nunaata toqqaannartumik ilaasortaanermigut iluaqutigisinnaasaanik, sulisutigullu qanoq isikkoqassanersoq pissaaffiillu suusanersut, Kalaallit Nunaata taamaattumut ilaasortaaneranut. Pingaarpoq qulaajassallugu, ilaasortaaneq pisariaqartitsineq aallaavigalugu pisariaqarnermoq. Taamaattumik toqqaannartumik ilaasortaannissamik kissaateqarneq itigartinngilarput, akerlianilli kingunissaasa naatsorsuusiornissaat

¹ <https://sermitsiaq.ag/ingen-planer-medlemskab-i-who>



ujartorlugu, aammalu tunngavilersuutit allat, sooq Kalaallit Nunaat tassunga ilaasortaasariaqarnersoq, uani aaliangigassatut siunnersuummi ersarissumik takuneqarsinnaangimmat.

Taamaattumik isumaqarpugut, kingunissaanut naatsorsuutit takutinneqaqqaartariaqartut ilaasortanngunnginnermi. Ilaasortanngornermimi isumaqatigiissuteqarnissamut mianersussaagut, allaffissornermut annertusaasussanut kalaallinut iluaqtissartai apeqqutaatillugit. Taamaattumik apeqqutigerusunnarpoq, Kalaallit Nunaata ilaasortaaneq taanna sukkuq iluaqtigissaneraa? Nunatut sumut pituttussaagut? Nukiit suut pisariaqartinneqarpat? Qanoq akeqassava? Pisortaqrarfiup suup ingerlatissavaa?

Taamatullu siunnersuummi aamma allassimavoq, nuna soorlu assersuutigalugu Kalaallit Nunaat, ilaasortanngornissaminik qinnuteqarsinnaasoq, Danmarki taassuminnga kissaateqarpat. Taamaattumik apererusuppunga; Danmarkip kissaatigaa, Kalaallit Nunaat ilaasortanngornissaminut qinnuteqassasoq?

Taamatut oqaaseqarluta isumaqarpugut, tunngavilersuutit ersarissut pigisariaqartut nalilersorneqarlutillu taamaattumut ilaasortanngunnginnermi, taamaattumillu siunnersuut ilaqtariinnermut- Peqqissutsimullu ataatsimiititaliamut suliassanngorlugu ingerlateqqipparput, siunnersuutip akuerineqassaguni akuerineqannginnerani.